

PRIMER CART NI BCUAA SAN PABLI LO DE BNIETY CORINTO NI RELDILAAZ JESUCRIST

¹ Nare Pabli, Dios bcuabeeny naa gaca tuby apóstol xte Jesucrist. Sóstenes zuguané nare, laab ni reldilaazzacbi Jesucrist. ² Ne nare cacuáa cartré par laat ni areldilaazti xtiidx Dios láani guidx Corinto, laat ni ananiat nez lo Dios pur Jesucrist, ax abcuabee Dios laat gacti xpinny cun irateru de bniety iranez ni areldilaazza Jesucrist, laany ni nány Dad par dunni ne par laadeb. ³ Xtadni Dios ne Dad Jesucrist gunldeeney quiat ne iguaadny laat guelnaldiulaaz.

⁴ Nare quít rianlaaztia rdeeda gracy Dios pur laat zec ni agucnény laat pur ni reldilaazti Jesucrist. ⁵ Ne pur ni nát tubyzi cun Crist ax quesentiand agucné Dios laat, abguAADNY laat iralote guelrieny par güeet ne gacbeet xtiidxny. ⁶ Ziy xquel riény dec didxldí ná irate ni abindiagti pur Crist desde chi guzulo reldilaaztiny. ⁷ Ax xíteete runlieedxit guelgucné xte Dios lalzi ni canuut dxi ni gueed Xtadni Jesucrist stuby. ⁸ Ne Dios gacnény laat par yalotepac sutipnét ni reldilaaztiny, te par quít xi xtuldtit chúu dxi ni gueed Xtadni Jesucrist stuby. ⁹ Te pur Dios runpacny cumplir xtiidxny, ne laaniy ná ni abcuabeeny laat gacti tubyzi cun Xtadni Jesucrist.

10 De saniroldilaazni Jesucrist, pur laany rguuin rnaaba lot gacti tubylo, quit ldasaat sino que gulgac tubyzi, gulgaany tubyzi xgab. **11** Rniia laat ziy de saniroldilaazni Jesucrist, te pur agucbiia dec nuu didxguidx lagac cun de saat, ziy gudixtee de xfamily Cloe luua. **12** Laadeb guniideb dec nuu de ni rnii: “Nare naa xpiny Pabli”, nuuza de ni rnii: “Nare naa xpiny Apolos”, chiy nuuza de ni rnii: “Nare naa xpiny Bed”, ne nuuza de ni rnii: “Nare naa xpiny Crist.” **13** Per nare rniiia laat dec tubyzi na Crist te pur gati naretia gutia lo cruyz pur laat, nicliza quit brubnistit par gacti xpinnia. **14** Xtiosten Dios dec chi guaa ladxti, quintru tu btiubnistia quesoltisy Crispo ne Gayo. **15** Ax ziy xquel quit xo iniitit dec brubnistit par gacti xpinnia. De bniettisy ni aguniia laat btiubnisa, **16** ne btiubniszaca de xfamily Estéfanas, per quintru tu renelaaztia btiubnisa. **17** Te pur quit bxiaalhti Crist nare par itiubnisa bniety, laany bxiaaldny naa par itiicha diidx xa xquel par gap bniety perdón lo Dios. Ne quit caninétia bniety cun de diidx ni lalza nare idxlodeb xlat ni chanédeb cuend xi par guty Jesucrist lo cruyz.

18 Irate ni rniin xi pur guty Jesucrist lo cruyz, xíteete sactini par de ni zé nez mal. Per par dunní ni ardxapni perdón, quesentiand sac guelguty xtenny te pur ziy racbeen guelnabee ni ráp Dios par ichuny zec ni nabánni. **19** Ne lo xquiits Dios rnii:

Sácaná de ni rnii quesentiand nán
ne scuaya xquelrieny de ni rnii quesentiand
racbee.

20 Anre, ¿cúnlesa de ni rnii quesentiand nán? ¿Cúnlesa de maistrí xte ley? ¿Cúnlesa de ni rnii nán irate pur de cos xte lo guichliuré? Par Dios xíteete sancti guelnázipac xte bniety guichliu par irate.

21 Ax pur guelnán xte Dios nanchuuny dec quit gumbeeti bniety guichliu laany pur guelnázipac xtendeb, ningui baanny xgab íldany bniety lo castigu pur de xtiidxny ni caseedni bniety. Ne de ni ldá lo castiguqui ná de bniety ni reldilaaz laany, masquipacza belati par de ni quesentiand nán xíteete zeloti ni caniin pur Crist.

22 De bniety Israel rcaazdeb iniádeb de milagri par chaldilaazdeb, chiy de ni quit ná bniety Israel rcaazdeb guindagdeb tuby cos ni nagánru par chaldilaazdeb. **23** Per dunní ni caseedni bniety ná xi par guty Jesucrist lo cruby, ax quit rziguelti de bniety Israel chaldilaazny, chiy par de ni quit ná bniety Israel ax ni quit illiúzy ná ni caseedni bniety. **24** Per par de ni reldilaaz Dios, zecli de bniety Israel ne zecliza de ni quit ná bniety Israel, pur Crist riény guelnabee ne guelnán xte Dios. **25** Te pur axt lúltmí ni run Dios ni rlilo binguichliu dec quit xi sancti, niy ná ni mazru sac lo guelnán xte binguichliu. Ne axt lúltmí guelnabee xte Dios mazru sacni lo guelnabee xte binguichliu. **26** Gulgacbee de saniroldilaazní Jesucrist dec duudxzi de ni reldilaaz laany ná binnán segúñ lo guichliuré, duudxzi de ni reldilaaz laany nap guelnabee lo guichliuré, ne duudxxiza de ni reldilaaz laany ná ni zá lo de family ni nuu tu ná lo guichliuré. **27** Per gati xínii mazru zienti ni gulliaa nán ná ni reldilaaz Dios, laany bsaanny

gac ziy te par isanxtiuny de ni quesentiand nán, ne mazruza pieny de ni gulliaa nap guelrnabee lo guichliuré reldilaaz laany te par isanxtiuny de ni quesentiand nap guelrnabee. ²⁸ Dios bcuabeeny de bniety ni rlilo binguichliu dec quit xi illiúti, de bniety ni rlilo binguichliu dec quit xi sacti, de bniety ni quit tu náti lo guichliuré te par idzicány guelnaroo xte de ni bseed, de ni nuu tu ná lo guichliuré. ²⁹ Ax ziy xquel ruteete quit tu chaleeti izubyaati laani nez lo Dios. ³⁰ Anre pur Dios anát tubyzi cun Jesucrist, ax pur laany raadnì guelnán xte Dios. Ne pur ni roldilaaznì Jesucrist aquít idxáldtin castigu, pur laany ananian ne ardxapzacnì perdón lo Dios. ³¹ Ziy xquel par gac zec ni cá lo xquiits Dios rut rnii:

Belati nuu bniety rcaazbì izubyaab laab,
güenru su izubyaab Xtadnì Jesucrist te pur,
pur laany zéed guelgucné.

2

¹ Laat nánti de saniroldilaaznì Jesucrist dec chi guaa ladxti, chi benía laat xtiidx Dios, quit guninétia laat cun de didxbé o cun de diidxza ni nagán par gacbeet. ² Lalzi ni guzuguánia laat quitru xi stubyti benía laat, nare benétizia laat pürzi pur Jesucrist par gacbeet xi par gutyny lo cruzy. ³ Ne chi bdzinìa ladxti ax zepacza ni quit rápti juers, racdxaichaíldípaca pur guelnadxiby ni bziienia nez lot. ⁴ Ziyza chi guninía laat, chi benía laat xtiidx Dios, quit guninétia laat cun de diidx ni chalee gúna gan laat pur de xtiidxa sino que baania gan reldilaaztì Crist pur guelgucné xte Spíritu Sant ne xte Dios. ⁵ Te par yíany dec ni reldilaaztì Jesucrist

zéedni pur guelgucné xte Dios gati pur guelnánti xte binguichliu.

⁶ Masquí belati chi rseedni de bniety ni aguguitru nán xtiidx Dios, rseednideb pur guelnán pur ni anaganru ni rseednideb. Per gati pur guelnánti xte lo guichliuré, gati pur guelnánti saa ni nap de ni rnabee lo guichliuré, guelnán ni teru chúu dxi nitlo. ⁷ Sino que pur guelnán ni zéed pur Dios, te par idxueen diidx xa ná xgab Dios, xgab ni guc zec tuby cos xgaats par bniety guichliu. Ne xgabqui ná guelchaldilaaz Jesucrist, ax desdi anste ni gurixti guichliu baany Dios xgabqui par chalee idxáldni llayabaa. ⁸ Niy ná tuby cos ni quit niacbeeti de ni rnabee lo guichliuré, te pur belrulati niacbeedebni ax quit nicuaatideb Xtadni Jesucrist lo cruce, laany ni rápny guelrnabee. ⁹ Per lo xquiits Dios rnii:

Ruteete gady tu iniáti,

gady tu guindiagti

ne nic xgab gún binguichliu

pur de ni naguchuu Dios par de ni rcaaz laany.

¹⁰ Per dunní abliuu Diosni dunní pur Spíritu Sant xtenny ni rbeznén, te pur Spíritu Sant laany nanný irate, axt de ni mazru nagán ni zéed pur Dios.

¹¹ Laat nánti dec, ¿túlesa gacbee xi xgab cayun tuby bniety? Quesoltisla spírit xtenbi nán xi xgab cayunbi. Anre ziyzaquiy quesoltisy Spíritu Sant xte Dios nán xa ná xgab Dios. ¹² Ne dunní ni azonuun xnez Dios, quit rbeznétin tuby spírit ni zá lo guichliuré sino que arbeznén Spíritu Sant ni zéed de Dios, te par pur Spíritu Sant gacbeen irate ni abguaad Dios dunní pur güen ni nány. ¹³ Ax

de cosquiy ná ni caseedni bniety, per gati pur guelnánti xtenni sino que Spíritu Sant ná ni caliuu dunní xa iniin. Ziy xquel rseedni de cos xte Dios par de bniety ni arbezné Spíritu Sant.

¹⁴ Per bniety ni quit rbezné Spíritu Sant quit reldilaaztib de cos ni zéed pur Dios ni rliuu Spíritu Sant dunní, te pur par laab ni quit illiúziy. Ax quit xo gacbeetib de cos xte Dios te pur axtisy cun guelgucné xte Spíritu Sant par gacbee bniety xi zeloni. ¹⁵ Per bniety ni arbezné Spíritu Sant pur laany racbeeb irate de ni ná pur Dios, chiy nic tuby de ni quit rbezné Spíritu Sant quit xo gacbeeti xíni racbeeb de cosqui. ¹⁶ Lo xquiits Dios rnii: “¿Túlesa mazru nán que Dios par gaipy laany xa gúnny?” Per dunní pur Spíritu Sant ax tubyzi a ná xgabni cun Crist par cun Dios.

3

¹ De sanioldilaazni Jesucrist, chi guzuguánia laat quit guninétia laat zec de ni aguguit nán xtiidx Dios, nare guninía laat zec de ni quit cuenzi xi gánti pur Dios, zec de ni teste güeldilaaz Jesucrist. ² Senciy xquel guninía laat, zecpacza ni rdeed bniety lech tuby bdoor ni quit xo iquiinby ni rquiiny bnietroo, ziy xquel senciy guninía laat. Ne nicli anre quit xo ininétia laat zec de ni aguguit nán xtiidx Dios, ³ te pur zeczi nabányti zec ni run iraru binguichliu. Nuu guelracnalaaz ne didxguidx lagac cun de saat, niy ríeny dec zeczi nabányti zec iraru binguichliu ni quit zenuu xnez Dios. ⁴ Te pur chi rniit: “Nare naa xpíny Pabli”, o chi rniizacti: “Nare naa xpíny Apolos”, ¿ta gati ziy ríeny dec zeczi cayunti zecac tutix binguichliu?

⁵ Per nare rniiia laat: ¿Túlliy Pabli, o túlliy Apolos? Gulgacbee dec naizní tiop de ni cayun sirví lo Dios te par güelee güeldilaazti. ⁶ Digapacza choniin nare naa zec tuby ni rzibiny chiy Apolos ná ni rguilley, per pur Dios zeza cayacbeerut xtiidxny zec ni runny reroo tuby cuaneen. ⁷ Ax zecli ni rzibiny ne ni rguilley mandadzi cayundeb, Diosiy ná ni run reroo ni rzibindeb. ⁸ Anre ziyyaquiy nare cun Apolos tubylote mandadzi cadxanni, nántisni dec sniidx Dios dunní ni riáldni según mandad ni bsiáldny cad tubyní idxanni. ⁹ Pur ningui nare ne Apolos rac saa ni cadxanni xmandad Dios.

Chiy digapacza choniin laat nát lo llia Dios rut cadxanni dzihiny, o laazactí nát zec tuby yuu ni cazuub Dios. ¹⁰ Chiy nare ni catiicha xtiidxny naa zec tuby albanily ni rcualodziits idiazzaac xtsiinni pur ni bcuabeeny naa gúna cimient xte yuuqui. Ne de ni zeza caliuu xtiidx Dios, laadebiy nádeb zec de ni zeza cazuub yuuqui. Per ná par icualodeb xa caldesdebni ¹¹ te pur quit náti par ichudeb cimient ni abaania, ne cimientquiy ná guelreldilaaz Jesucrist. ¹² Ax de ni zeza caliuu xtiidx Dios, de ni caniin ná zec de ni zeza caldes yuu lo cimient ni caniin ná guelreldilaaz Jesucrist, bel cayundebni cun or o cun plat o cun de guiazzaacza o cun bred o yaxtily o cun guixguiza, niy zelo bel caliuudeb zec ni riáld o quit caliuudeb zec ni riáld. ¹³ Per chi idziny dxi ni gún Dios guelgurtisy xtenny, chiyru yíany xa ná xtsiindeb. Te pur dxiqui gac zecpacza chi rac prueb tuby cos lo gui par yíany la blliú o la quit blliú ni baany cad tuby bniety. ¹⁴ Ne belati blliú ni baanbi zecpacza tuby ni rzuub tuby

yuu ni quit xo chaaicquiti, ax scáab ni riáldbi pur ni baanbi. ¹⁵ Per belati quit illiú ni baanbi, ax zecpacza ni raaicqui liz tuby bniety ni pentisy rlá lo bal ziypacza teedbi, te pur zacbi perdón per quit xi yáldtib.

¹⁶ Pur ningui laat gulgabee dec laat nát zec xquiudoo Dios pur ni arbeznét Spíritu Sant xtenny. ¹⁷ Ne belati chúu ni itsily de ni reldilaaz Jesucrist pur guelrseed de ni quit ná par iseedbi bniety, ax snitlo Dios laab pur ni catsilbi yudoo sant xtenny ni caniin nát laat pur ni anát xpínnny.

¹⁸ Quit isacanti lagac laat. Belati nuu tubyti ni rlilo dec quesentiand nánbi nez lo binguichliu, güenru gúnbichiinbi nez lo Dios te par iguaadny laab guelnán. ¹⁹ Te pur nez lo Dios xíteete sacti guelnán xte binguichliu, tuby lat lo xquiitsny rnii: “Dios quit rsaantiny idiazzaac zec ni ná xgab de ni rlilo dec quesentiand nasindeb par gúndeb tuby cos ni quit ná xnezni.” ²⁰ Ziyza rniiiza stuby lat lo xquiitsny: “Dios nanchuuny xa ná xgab de ni rlilo quesentiand nán, per par laany xíteete sacti guelnán xtendeb.” ²¹ Pur ningui ruteete quit tu náti par izubyaa lagac laani dec laab náb xpíny tuby bniety o stuby bniety. Te pur zec ni areldilaazti Crist ax xtentí a ná irate, ²² xtentí anan zeclí nare Pabli, Apolos ne Bed par idxacnén laat cun xtiidxny. Xtentí ná guichliu, guelnabány, guelguty, ne de ni anuu ne de ni teru chúu, xixtentí ná irate. ²³ Chiy laat anát par Crist ne Crist ná Lliin Dios.

4

¹ Pur ningui, gulchané cuend dec dunní naizni

de mos xte Crist par iseedni bniety xa ná xgab Dios, xgab ni quit niacbeegati bniety gulo. ² Per laat nánti dec tuby mos ná par gúnbi irate ni riáld gúnbi par gap xlámbi confianz laab. ³ Pur ningui, quit xi gónti ni caniitisti pur naa o ni iniitisza de gurtisy pur naa, per nicli nare quit xo iniitia xa naa nez lo Dios. ⁴ Te pur nicli belati nare rliluaa dec gady xi mali gúna per gati pur ziyyi ax inia dec quit xi xfaltia nez lo Dios, quesoltisla Xtadni Jesucrist nán xa cayuna sirvi lony. ⁵ Pur ningui quit náti par cubeet tú cayun o tú quit cayun mazru güen, sino que gulsáan de cosqui par dxi ni gueed Xtadni Jesucrist. Laany isíenny cún ni ná didxldí pur dunní, dxiqui yíany la purzi nuu xi pur bdxanní sirvi lony o la guldípacní dibyquia dibylaazní bdxanní xmandadny, ax dxiqui gacbeen xi de diidx zaac inii Dios pur cad tubyní.

⁶ De saniroldilaazní Jesucrist, irate ni caniia laat güen par laatiy. Ne nare cun Apolos dunní nan tuby ejemplí par laat, te par pur dunní iseedti quit tedcatepacza izubyaat tuby bniety que zec ni ná par, te quit gun pur ziyy ax gónti menos cun stubybí. ⁷ Te pur nic tuby bniety quit sancti mazru lo stuby bniety o, ¿xix naptí ni quit bniídx Dios laat? Ne belati pur laany rápti ni rápti, ¿xínii rzubyaat laat zec ni lazu gati pur Dios ráptini?

⁸ Laat rlilot dec aquítru xi runlieedxtit, dec abi-aló nánti ne aquítru rquiintit dunní. Ax rzienti laat zec de rey per, ¿ójla niacpactí rey te par nin-abeen cun laat? ⁹ Nuu güelt rzienia dec dunní de apóstol, Dios bsiáldny dunní gacní zec de ni quit xi sancti, zec de biny mal ni riáld guelguty, ax

rdxalo de ángli ne de binguichliu zec ni cadeedni.
10 Chiy lalzi ni nan zec de ni quít inianlaaz par binguichliu pur ni catiichni de didxzaac xte Crist, laat ax rzubyaat laat dec quesentiand nánti pur ni reldilaaztiny. Dunní rzienní zecpacza de ni quít rápti juers, chiy laat rlilot dec quít xi runlieedxtit ne rápza de bniety didxdoo laat, didxdoo ni quitti par dunní. **11** Axt hórandxire a dunní cadeedni guelzii cun guelrldiaan, guelrdxá nis ne runlieedxní lady. Chiy iralote ni runné biny dunní, quitti lizní **12** ne zecpaczaxnarul rdxan rdxanni dzíiny par zeza guelnabány. Chi rnii de bniety mal diidx dunní ax rcaibni lodeb cun diidx zaac, rdxuelaazní ni runnétisdeb dunní. **13** Chiy zec chi rguichlaazdeb dixú pur dunní, ax rninezacnídeb. Ne axt hórandxire naizní zec tuby guixbiu par binguichliu, naizní zec lúltmi ni quít illiú par laadeb.

14 Quít cacuaatia cartré par isanxtiua laat, nare cacuáa cartré par ilídxla laat zecpacza de lliinia pur ni rcaaza laat. **15** Te pur masquipacza gaptí zec tsí mily de ni iseed laat pur Crist, per naretizia naa zec tuby dad par laat. Te pur, pur nare guzulo reldilaaztí Jesucrist chi bseeda laat de didxzaac xtenny. **16** Ax rguin rnaaba lot, gulbány zec ni nabánia.

17 Te pur par ziy rxiaalda Timoteo chatixlob laat, laab ni rcaaza zecac tuby lliinia ne laazacbí ni guldípacbí reldilaazbí Jesucrist. Laab isenelaazbí laat xa nabánia pur ni reldilaaza Crist, te pur zec ni nabánia ná ni caseeda ibány de ni reldilaaz Jesucrist irate de rut ráa. **18** Nuu de saat rlilodeb dec aquitru guedtixlotia laat ax rzubyaadeb laadeb

dec güen nabánydeb. ¹⁹ Per Dios iguaadny permis par yiub guedtixluaa laat, chiyrú gacbiia dún la guldípacdeb nabánydeb zec ni rnabee Dios o la rnizdeb. ²⁰ Te pur guél ibány zec ni rnabee Dios quit nátini de diidxzi sino que gún bniety zec ni rcaaz Dios. ²¹ Anre, ¿cún ni rcaaztí gúna chi guedtixluaa laat, tildnía laat o icaaza laat cun de diidx zaac?

5

¹ Abindiaga dec tuby de sanireldilaaztí Jesucrist nabanyéb xnaneenbí zecac chialbí, ne niclí de ni quit rumbee Dios quit runti saa duldqui. ² Ax, ¿xílesa pur rzubyaat laat? Xlat ni izubyaat laat, gulchúu nálas ne guldée bnietqui lot. ³ Masqui quit zuguaníaa laat, per a nare runa xgab pur laat zecac chi zuguaníaa laat, ax abanbaania xgab xa riáld bniety ni cayun duldqui. ⁴ Zec guelrnabee ni bniídx Jesucrist naa, nare rniiia laat guldexasaa. Chi y nalaazquit dec zuguaníaa laat ax pur guelrnabee xte Xtadnì Jesucrist, ⁵ guldzicá bnietqui tuby lad. Gulsáanbí laznaa bïndxab te par iziienbí o teedzacbí guelzii pur ni cayunbí ax gacbí perdón dxi ni gueed Xtadnì Jesucrist.

⁶ Quít náti güen rzubyaat laat ne chi y ax rsaanti rac saa de duldqui. Gulgacbee dec zec ni runné levadur cub par guechtily, ziyyaquíy cun tuby ni gún duld azezagac ziy cun iraru de saat. ⁷ Pur ningui, gulgaany pur yat xte de cosqui zecpacza cub harin ni quit nuu levadur quiani. Te pur zec ni gudinxú de bniety tuby llíly chi laní pascu par yadeb xte de xtulddeeb, ziyya pur guelgutu xte Jesucrist ananian nez lo Dios. ⁸ Ne xquel ni iza-claazni pur ziy ná dec ibánni dibyquia dibylaazni

zec ni riáld, zecpacza guechtily ni quit nuuchti levadur, xlat ni ibánni cun de mal ne de duld zec ni gubánni gulo.

⁹ Ne zec ni aguniia laat lo stuby cart ni bcuáa lot, quit ichaatit de ni nabánydxab. ¹⁰ Quit canitia laat pur de ni quit reldilaaz Dios, laadeb ni nabánydxabdeb o nazebylaazdeb o nádeb gubaan o rtodeb iriny de cos xlat ni itodeb Dios, te pur belati par ziy ax laat rquiiny idiiat lo guichliuré. ¹¹ Sino que de ni caniia laat quit ichaat ná de ni rnii dec sadenireldilaazti Jesucrist laadeb ne chiy ax nabánydxabdeb o nazebylaazdeb o rtodeb iriny de cos xlat ni itodeb Dios o rueedeb xtiidx biny o nádeb borrach o gubaan. Saa de ni nabány ziy nicli quit ná par iquinnétdeb. ¹²⁻¹³ Gati xcuendtia ná iniiia pur de ni quit rac saniroldilaazni Jesucrist la rápdeb duld o la quit rápdeb duld, Dios ná ni gún guelgurtisy cun laadeb, per xcuendni ná iguxnezni de saniroldilaazni Jesucrist. Pur ningui guldée bniety ni cayun duldqui lot.

6

¹ Zec chi xi rzacnét tuby de sanireldilaazti Jesucrist, ¿xínii zét lo de gurtisy par cuexnezdeb ni racti xlat ni chiat cun de sanireldilaazti Jesucrist? ² ¿Ta quit gánti dec teru chúu dxi de ni reldilaaz Jesucrist ná ni gún guelgurtisy par cun de binguichliu? Ne belati teru gúnti guelgurtisy par cun binguichliu, ¿xínii niy de ni nalolesa ni rzacnét de saat quit chalee cuexnezti? ³ ¿Ta quit gánti dec axt lo de ángli xte Dios teru idxapni guelgurtisy? ¡Ax axtemás zelee ibexnezni ni cadeedni lo guichliuré! ⁴ Pur ningui zec chi xi rzacnét de

saat, ¿xínii niy zét cun de ni quit nagab lo de xpíny Crist par cuexnez ni ractí? ⁵ Caniiang laat te par itiulot. Te pur, ¿tatix nic tubytí quit chalee cuexnez ni rzacnét de saat? ⁶ Per laat xlat ni gúntí ziy ax runtí demand de saat lo de ni nicli quit run cuend Dios.

⁷ Ne xtiu ná ibinét de saat nez lo gurtisy dec cadildti, ¿xínii quit güenru güelaaztí ni runnédeb laat? ¿Xínii quit güenru sucuáadeb xixtentí? ⁸ Per ziy laaltí cayuntí de malqui cun de sanireldilaaztí Jesucrist. Rcáat xixtendeb, ne runnédeb zec ni quit riáld gunnétdeb.

⁹ ¿Ta quit racbeet dec de ni ná mal quit yiiutideb lo guelrnabee xte Dios? Gulgacbee dec lo guelrnabee xte Dios quit yiiuti de ni nabánydxab, de ni rto de dios fals, de ni ráp stuby nguiu o stuby gunaa, ne de ni rcaaz lagac saa nguiuni zecac tuby gunaa. ¹⁰ Ziyza de gubaan, ne de ni rzebylaaz xixte bniety, de borrach cun de ni rniyá bniety ne de ni rguíly nez rdzicá xixte bniety, quit yiiutideb lo guelrnabee xte Dios. ¹¹ Nuut gubányti ziy gulo, per anre ananiat nez lo Dios, anát par Dios, ne anagabtí zec tuby ni gady gúnti duld pur guelrnabee xte Xtadní Jesucrist ne pur Spíritu Sant ni rbeznét.

¹² Didxldíquiy dec zelee idxanní nitisy rcaazní, per gati irati ná güen gún bniety. Zelee gúna nitisy rcaaza, per quit isaantia xi inabee nare. ¹³ Nuu de ni rnii: “Comid ná par láani bniety, chiy láani bniety ná par comid.” Didxldíquiy, per teru initlo Dios iropte de cosqui. Per gati didxldítiy dec xcuerpi bniety ná par guelrun de ni quit illiú cun de ni quit rac chialdeb. Te pur xcuerpín ná par Dios,

ne laany rnabeeny xcuerpiñ. ¹⁴ Ax zec ni gubíi gusbány Dios Xtadní Jesucrist, ziyya sbíiza isbánny dunní pur guelrnabee xtenny.

¹⁵ Gulgacbee dec tubyzi anát cun Crist, digapacza choniin xcuerpiñ a ná tuby ladaa xcuerpi Crist. Ne chiy, ¿ta icáan xcuerpi Crist ni caniin ná xcuerpiñ par chonan tuby gunaadxbab? ¡Quit chúuti dxi ná par gac ziy! ¹⁶ Te pur gulgacbee dec chi rdxaa bniety tuby ni quit rac chialbi ax anágacdeb tubyzi cun ni dxaabqui. Laat nánti dec lo xquiits Dios rnii: “Iroptedeb anádeb zec tubyzi bniety.” ¹⁷ Per ni a ná tubyzi cun Xtadní Jesucrist, náb tubyzi cun laany pur Spíritu Sant.

¹⁸ Pur ningui, gulcualo quit gúnti de ni quit illiú cun de ni quit rac chialti. Irateru duld quit rxínti xcuerpi bniety zec ni rllíin xcuerpi bniety pur guelrun de ni quit illiú cun de ni quit rac chialdeb. ¹⁹ Te pur gulgacbee dec xcuerpit ná xquiudoo Spíritu Sant ni bniídx Dios laat, ax zec ni arbeznét Spíritu Sant aquítru rnabeetit lagac laat. ²⁰ Te pur par ziy gudilly Jesucrist pur dunní chi gutyny lo crucey. Pur ningui, gulgaany us xcuerpit par gúnti zec ni rdxalaaz Dios, te pur laany rnabeeny laat.

7

¹ Anre ax aicabia pur ni rnabdiidxti nare lo cart ni bxiaaldti luua. Nare rniiia güen ná quit guchnaati bniety. ² Per par quit gún bniety duld cun stuby bniety, ax güenru cad tuby nguiú gap chialni ne cad tuby gunaa gapza chialni, ³ te par ideed gust nguiu chialni ne ideed gustza gunaa chialni. ⁴ Te pur chi abichnaa tuby gunaa, aquítru rnabeetib xcuerpiñ sino que xte chialbi a náni.

Ziyza chi abichnaa tuby nguiu, aquítru rnabeetib xcuerpiб sino que xte chialzacbi a náni. ⁵ Pur ningui, nguiu ne gunaa quit náti par icuat xcuerpit par chialti. Per belati tubylo aguniit cun chialti dec quit iguaalddit chialti o quitza iguaalddi chialti laat tuby tiop dxi par inaabti lo Dios, ax güenquiy. Per chi agudeed de dxiqui, guldxasaagac stuby te par quit gún bindxab gan laat cun de xgabti.

⁶ Quit caniitia laat nápac par guchnaa bniety, per quit xi mali ná guchnaat. ⁷ Xgaba ná belrulati irate bniety niac zec nare, per cad tuby bniety abguaad Dios xgab xa ibánybi, la guchnaab o la quit guchnaab.

⁸ Par de ni gady guchnaa ne par de viud, nare rniia dec güen ná yáandeb zec nare. ⁹ Per belati quit güelaazdeb sin quit guchnaadeb, ax mazru güen su guchnaadeb xlat ni iteeddeb xcuerpideb guelzii.

¹⁰ Chiy de ni abichnaa, gati xtiidxtia ná ni iniiia laat, xtiidx Xtadni Jesucristni dec quit isaanti gunaa chialni. ¹¹ Per belati ibicáb lo chialbi quit náti par guchnaab irinqui, güenrupac ná chúu diidx zaac par icasaadeb stuby. Ne ziyza nguiu quit náti par ldáab chialbi.

¹² Anre ni iniiia quit guniiti Xtadni Jesucristni, per nare rniia laat: Belati nuu tuby nguiu ni reldilaaz Jesucrist chiy chialbi quit reldilaazny, ne belati par gunaaqui quit xi gúnti pur ziy, ax quit náti par ldáadeb. ¹³ Ziytiziacza belati gunaa reldilaaz Jesucrist chiy chialbi quit reldilaazny, ne belati par nguiuqui quit xi gúnti pur ziy, ax quitza náti par ldasaadeb. ¹⁴ Te pur nguiu ni quit reldilaaz Jesucrist, zunldee Dios quiab

pur ni reldilaaz chialbiny. Chiy gunaa ni quit reldilaaz Jesucrist zunldeeza Dios quia pur ni reldilaaz chialbiny, ne ziy xquel gunldeeza Dios quia de lliindeb. Te pur belati nic tubydeb quit reldilaaz ax quitti nez par gunldeeny quia lliindeb. ¹⁵ Per belati nguiu o gunaa ni quit reldilaaz Jesucrist rcaazbi ldáab chialbi pur ni reldilaaz chialbi Jesucrist, ax su ldáadeb. Ni reldilaazqui quit náti par gúnbi juers ibanynépac chialbi laab, te pur quit guridxti Dios dunní par ibánni cun didxguidx. ¹⁶ Ne ziyza gunaa quit gántib la zunbi gan chaldilaaz chialbi o belati nguiu ná ni areldilaaz ax quitza gántib la zunbi gan chaldilaaz chialbi.

¹⁷ Nare rniiia cad tuby de ni areldilaaz Jesucrist, ná par cuezdeb lo guichliuré zec ni absiáld Dios laadeb, yáandeb zectisy ni nádeb chi guzulo reldilaazdеб Jesucrist. Ziy ná ni raipia irate de saniroldilaazní Jesucrist gúndeb. ¹⁸ Belati tuby bniety chi guzulo reldilaazbi Jesucrist anuub seny ni ruu de bniety Israel, ax su náb ziy. O belatiza quitbi senyqui chi guzulo reldilaazbi Jesucrist, quit náti par chúub senyqui. ¹⁹ Te pur quit xi gúnti la nuu bniety senyqui o quity bniety senyqui, ni mazru sac ná gún bniety zec ni rnabee Dios. ²⁰ Pur ningui, gulyáan zec ni nát chi guzulo reldilaaztí Jesucrist. ²¹ Belati esclav liú chi guzulo reldilaazuny, quit náti par chúu guelrsaa xa gúnu. Per belati zeleeldi quítru gacu esclav, ax mazru güen baany pur ibicoo xte ni noo esclavqui. ²² Bniety ni ná esclav chi guzulo reldilaazbi Crist, laab anáb zecac tuby ni quit náti esclav par gúnbi sirví lony. Chiy bniety ni quit náti esclav chi guzulo reldilaazbi

Crist, ax laany ná ni arnabeeny laab. ²³ Laat nánti dec agudilly Jesucrist pur laat, ax par Dios anát. Quit náti par isaanti inabee binguichliu laat cun de engany xtendeb. ²⁴ Pur ningui rniia laat de saniroldilaazni Jesucrist, gulyáan zec ni nát chi guzulo reldilaaztì Crist.

²⁵ Anre laat ni gady guchnaat, Xtadní Jesucrist quit xi guniitiny pur ziy. Per nare zelee ilídxaa latxa gúnti, ne xgaba ná dec zeldilaaztì ni inilia te pur, pur guelrlaslaaz xte Dios absiáldny nare mandad ni cayuna. ²⁶ Pur ningui nare rliluaa dec zectipacza trabaju ni cadeední anre, ax güenru quit guchnaatit. ²⁷ Ni abichnaa, quit náti par isaanbi chialbi. Chiy ni gady guchnaa, quit gúntib pur guchnaab. ²⁸ Per belati runu xgab guchnoo, quit duldti ná guchnoo. Ziyza de dxaap ni rcaaz guchnaa, quit xi duldti ná guchnaadeb. Per rguixtiia lot dec iralote rdeed bniety ni ruchnaa, ax ziy ná ni quit rcaaztia teedti.

²⁹ Ni rcaaza gacbeet ná dec zeza cadóp tiamp ni ziopní lo guichliuré par idxanní xmandad Dios. Pur ningui de ni abichnaa, gulgaany sirví lony axt rutti chalee zecac de ni gady guchnaa. ³⁰ Ax niclí guelnalas, niclí guelrzaclaaaz ne nicliza pur de cos ni nap bniety lo guichliuré quit náti par icuadengui gún bniety xmandad Dios. ³¹ De bniety ni quit xi runlieedxti lo guichliuré, gulgaany xcuendti dec quit xi naptit, te pur ni rdeed ná irate ni nuu lo guichliuré.

³² Ni rcaaza par laat ná dec quit chúutit guelrsaa pur de cos xte lo guichliuré. Tuby nguiu ni gady guchnaa mazru runbi xgab pur xmandad Dios,

mazru runbi pur gúnbi zec ni rdxalaazny. ³³ Per tuby nguiu ni abichnaa mazru runbi xgab pur de cos xte lo guichliuré, mazru runbi pur chuzaclaazné chialbi laab ³⁴ ax tiop xnez a ná xgabbí, pur Crist ne pur chialbi. Ziyza tuby gunaa ni gady guchnaa mazru runbi xgab pur xmandad Dios, dibylagaatepac runbi entriagu laab par gúnbi zec ni rdxalaazny. Per tuby gunaa ni abichnaa mazru runbi xgab pur de cos xte lo guichliuré, mazru runbi pur chuzaclaazné chialbi laab.

³⁵ Irate ni caniia laat, caniiani par gacnía laat gati par icuatio guchnaat, caniiani par ibányti zec ni riáld ne ni illiú ax gúnti ne ibányti zec ni rcaaz Xtadni Jesucrist sin quit xi icuati.

³⁶ Tutix nguiu ni run xgab guchnaa cun xchaapni ne belati gunaaqui acriáld guchnaab, belati ziy rundeb xgab ax su gúndeb zec ni rlilodeb ná güenru par laadeb. Belati guchnaadeb, su guchnaadeb. Quit xi duldti ná ruchnaa bniety. ³⁷ Ziyza tutix bniety ni quit run xgab guchnaa, quit náti par gúnbi xgab dec nápac par guchnaab belati apac baanbi xgab dec quit guchnaatib. Te pur güenacza ná quit guchnaa bniety. ³⁸ Pur ningui rniiia laat, güenqui ná guchnaa bniety, per mazru güen belati quit guchnaa bniety.

³⁹ Tuby gunaa chi abichnaab, quit náti par gapbi stuby nguiu chi nabány chialbi. Per belati gaty chialbi azelée guchnaab stuby, per cun tuby sanireldilaazbi Jesucrist. ⁴⁰ Per nare riluaa dec mazru güen ibánybi belati quit guchnaab stuby. Ziy ná xgaba pur ni rbeznézaca Spíritu Sant zecac laat.

8

¹ Anre iniia laat pur de aliment ni riacldee nez lo de ni rlilo bniety ná dios. Dunní nánní dec iratecní nánní xa idxanní pur de cosqui, per nuu güelt pur guelnán ax rzubyaa bniety lagac laani. Per guelrcaaz ná ni mazru sac, te pur, pur guelrcaazqui zelee idxacnésaan par chaza gacbeen xa ibánní. ² Belati nuu bniety runbí xgab dec abialo nánbí irate, rsacanzib laab te pur zienzi ni rieedx gacbeeb. ³ Per Dios ananchuuny tú guldípac rcaaz laany.

⁴ Anre pur guelrquiiny de aliment ni abiacldee nez lo de ni rlilo bniety ná dios, dunní nánní dec quit xi guelrnabeeti nap de diosqui lo guichliuré, te pur tubyzi Dios nuu. ⁵ Masqui nuu bniety ni rlilo dec nuu zienzi de dios ni rnabee llayabaa ne lo guichliu, ⁶ per dunní nánní dec tubyzi Xtadní Dios nuu ne pur laany nuu irate ni nuu ax par laany dxúun lo guichliuré. Tubyzi Jesucrist ná Dad par dunní te pur, pur laany nuu irate ne pur laazacny rdxapní guelnabány par cun Dios.

⁷ Per gati irati bniety run xgab ziy. Te pur nuu de bniety ni goloru btodeb iralozy ni blilodeb ná dios, ax anre ni teste güeldilaazdeb Jesucrist rziiedeb dec duld ná iquiiny bniety de aliment ni abiacldee pur de diosqui. ⁸ Dunní nánní dec gati de ni rquiinti bniety run ax amazru güen nabánybi nez lo Dios, ziytiziacquiy belati iquiinní o belatiza quit iquiinní saa de alimentqui. ⁹ Per masqui laat nántí zelee iquiinti nitispac, ná par icualot quit günti gündeb duld laadeb ni teste güeldilaazdeb Jesucrist. ¹⁰ Te pur belati liú ni quit xi rziientiu

iquiiniu nitispac, zubbu caquiiniu de aliment ni abiacldee nez lo de xtiosdeb, chiy iniá tuby de ni teste güeldilaaz Jesucrist liú ax iquiinzacbi de alimentqui masqui nez láanbi rziienbi dec quit náti güen ni cayunbi. ¹¹ Ax pur guelnán xtenu cayunu cayunbi duld pur ni quit rziienzaacbí iquiinbi de cosqui, per güené cuend dec né pur laab guty Jesucrist lo cruzy. ¹² Pur ningui, belati liú gúnu tuby cos ni ná mal par de ni teste güeldilaaz Jesucrist ax gúndeb duld pur causi liú, chiy duldiy cayunu nez lo Crist. ¹³ Güenru belati pur tuby de ni rquiinia run, run tuby de saa duld ax quítru iquiintiani te par quit gúnbi duld pur causi nare.

9

¹ Laat nánti dec zelee gúna ni rcaaza zec guelnabee ni napa pur apóstol ni naa. Nare agunáa Xtadni Jesucrist ne laat ná ni abaania gan par laany pur ni agüeldilaaztiny. ² Belati nuu de ni quit rumbee nare zec apóstol, per laat nánti dec apóstol nare. Te pur zec ni areldilaazti Jesucrist ax ríeny dec didxldícpac apóstol nare.

³ Ne par de ni quit reldilaaz dec naa apóstol, squé ná ni rcabia lodeb: ⁴ Napa nez iniidxti ni iquiinia ne ni guia. ⁵ Ne ziyza zeleeza guchnaa cun tuby gunaa ni rac saniroldilaazni Jesucrist par chaníab nez ruttisy cháa, zec ni run iraru de apóstol cun de bets Xtadni Jesús ne Bed. ⁶ O, ¿tatix narezia cun Bernabé bdxáldni idxanni xmandad Dios xcuendquín? ⁷ Per nic tuby suldad quit reti lo guerr xcuendquíni, nuu ni rguilly de gaxt xtenbi. Ne ziyza tuby ni rzibiny uv, ¿tatix quit chalee iquiinbíni? Chiy tuby ni nap de vag ni

rllii, ¿ta gati zelee iquiinbi xlechdem? ⁸ Ne gati xgabziti binguichliu ná ni caniia laat, néza lo ley ni bdeed Dios Moisés rnii ziy. ⁹ Te pur lo leyqui rnii: “Quit yianlaazu ideedu ni go de ladxaa lalzi cayundem xtsiiniu.” Dios quit guniitiny ziy purzi ni ruuny guelrsaa pur de ladxaa, ¹⁰ sino que néza pur dunníy guniiny. Te pur zecli ni raan ne ni rsía trigu, tubylote zénedeb cuend dec nuu xi icáadeb. ¹¹ Anre dunní ni abseedni laat xa chanuut xnez Dios, ¿ladxa cuendrootey belati gacnét dunní par chaza guelnabány? ¹² Belati stuby de ni rseed laat relee rcáadeb ni riáld ideedtideb, ax ziyya zaibguelpac gacnét dunní.

Per masqui ziy dunní gady xi inaabtin laat, cadxuelaaztisni ni cadeedni te par quit xi icaldo dec aquítru guindiagti bniety de didxzaac xte Jesucrist. ¹³ Laat nánti, irate de bxoz ni run sirvi laniudoo xte Dios, riálddeb duudx ni rené de bniety Israel lo Dios par racdeb guelnabány. Ziyya irate de bxoz ni run sirví loldedooqui rut rené de bniety de ladxaa par Dios, riáldzadeb duudx ni rené de bniety par racdeb guelnabány. ¹⁴ Anre ziyytiziacza gunii Xtradní Jesucrist pur de bniety ni rliuu de didxzaac xtenny, dec pur de bniety ni caseeddeb ná par gacdeb guelnabány. ¹⁵ Per nare xíteete quit cacáatia, nicliza quit cacuaatia cartré lot par chúu xi iniidxti nare. Te pur par nare güenrudxa su gatia xlat ni chúu ni idzicá guelrza-claaz ni napa caseeda de bniety de didxzaac xte Jesucrist.

¹⁶ Xíteete quit rzubyaatia nare pur caseeda de bniety de didxzaac xte Jesucrist, te pur mandadpacqui abiálida. ¡Ne prolliza naa belati quit iseeda

de didxzaacqui de bniety! ¹⁷ Pur ningui, belati cayuna mandadré pur rdxalaaza gúnani, ax teru nuu xi icáa. Per niclipacza belati quit rdxalaaza gúna mandadré, per laani absiáld Dios nare. ¹⁸ Ax ni runa gan ná guelrzaclaaz ni napa dec masqui quit xi cacáatia, masqui quit cacáatia ni riáld icáa tuby bniety ni rliuu de didxzaac xte Jesucrist per zélaa caseeda de didxzaacqui de bniety.

¹⁹ Ne masqui quit tu bnietti rnabee nare pur mandadqui, per a naa zuguaa par irate bniety te par chalee gúna gan gac zienru xpíny Crist. ²⁰ Ax chi zuguaníaa de bniety Israel, nare runa pur iziendeb dec saa bniety Israelní rac te par chalee gúna gan gacdeb xpíny Crist. Chi zuguaníaa de bniety Israel ni runpac pur chanuu xley Moisés ax runzaca zec tuby ni zenuu leyqui, te par chalee gúna gan gacdeb xpíny Crist (masqui nare nánna dec quit rnabeeti leyqui naa). ²¹ Chiy chi zuguaníaa de ni quit náti bniety Israel, de ni quit zenuuti leyqui ax masqui nare nánna dec Dios ná ni rnabee naa pur ni nabária zec ni rnabee Crist, per runa pur iziendeb nare zecac tuby saadeb te par gúna gan gacdeb xpíny Crist. ²² Chi zuguaníaa de ni runtioplaaz par gúndeb o iquinzadeb tuby cos, ax runa pur izíenzaacdeb cun naa te par gacniádeb gacdeb xpíny Crist. Nez rattisy záa runa pur iziieny de bniety nare zecac tuby saadeb, te par tuby xnez o stuby xnez masiu duudxdeb gúna gan gapdeb perdón pur Crist. ²³ Irate de cosré cayuna pur guelrcaaz ni napa cun de didxzaac xte Jesucrist, te par tubylote gunldee Dios quiaa cun quia irate de ni reldilaaz de didxzaacqui.

²⁴ Laat nánti chi ruu tuby carrer zieny ni rlluuin, per tubyzi ni rcáa premy. Anre ziyyaquiý laat gulgaany pur icáat ni iniidx Dios. ²⁵ De ni rlluuinqui quesentiand rcualodeb laadeb te par quit xi icuati illuuindeb. Rundeb ziy par gúndeb gan, ne ni rundeb gan ná tuby curon laurel ni rbizac. Per dunní ni cadxanní pur icáan ná tuby premy ni quit chúuti dxí nitlo. ²⁶ Ax nanchuua xi pur cayuna, gati cuntisy cayuntia tuby cos sin quit ganna xíni, quit cuntisy cayuntia ni cayuna. ²⁷ Pur ningui ni cateettizia naa par chalee inabiiia nare gúna zec ni riáld, te quit lalza nare ni caseeda de bniety de didxzaac xte Jesucrist, quit xi yálda lo Dios.

10

¹ De sanioldilaazní Jesucrist, gulchanelaaaz dec de to xpingul gulalni ni guzané Moisés, iratedeb guzadeb niguét zá ni bxiaald Dios ne iratezadeb gudeed lo nisdoo ni lá Nisdoo Xnia. ² Ziy xquel bíeny dec xpiny Moisés laadeb pur ni iratedeb guzané laab niguét záqui, ne gudednézadeb laab lo nisdooqui. ³ Chiy iratezadeb bquiindeb ni bxiaald Dios desde llayabaa par iquiindeb. ⁴ Ne iratezadeb güéedeb nis ni bguaad Dios laadeb, nis ni guch tiix tuby guia. Niy zelo dec desdi chiy agac rbezné Crist laadeb nez ruttisy zédeb. ⁵ Per masqui ziy ziendeb quit baantideb zec ni rdxalaaz Dios, ne irate de ni quit baanti zec ni rdxalaaz Dios, gutydeb nez lo yiubiz rut cuandzadeb.

⁶ Irate ni gudeeddeb, gudeeddeb ziy par gacbeen quit náti güen idxanní saa de mal ni baandeb. ⁷ Quit náti par itot de cos ni rnii biny ná dios zec ni baany zienzi de to xpingul gulalniqui,

te pur laadeb lo xquiits Dios rnii: “Gurideb, bquiindeb, güéedeb chiyru güesúdeb baandeb ni quit ná par gúndeb.” ⁸ Ziyza quit náti par gún bniety de ni quit illiu cun de ni quit rac chialdeb, zec ni baany zienzi de to xpíngul gulalniqui parzi tubyzi dxi guty galdbichon milydeb. ⁹ Nicliza quit náti par isaclon Dios zec ni baany zienzi de bnietqui, parzi gudzidiia de béeld laadeb ax gutydeb. ¹⁰ Ne quitiza guél iniin quit cayunti Dios zec ni riáld, te pur ziy baany zienzi de to xpíngul gulalniqui parzi pur guél quit xi nayiulaaztideb, ax bxiaald Dios tuby ángli ni gudinxú laadeb.

¹¹ Irate ni gudeeddeb, cuani lo xquiits Dios te par gacbeen quit náti güen idxanní zec ni baandeb, dunni ni nabánní anre ni acadópru tiamp ni ideed binguichliu cuend Dios. ¹² Pur ningui bniety ni run xgab dec aquitru gúnti duld gan laab, güenru icualob quit gún duld gan laab. ¹³ Irate de ni cadeedti quit nátini ni quit rdeed bniety, te pur Dios quit cuelaaztiny laat. Quit isaantiny teedti tuby ni quit güelaazti, ne laany ná ni gacnény laat par gacbeet xa gúnti o xa güelaazzacti ni cadeedti.

¹⁴ Pur ningui de sanioldilaazni Jesucrist, zec ni rcaaza laat, nare rnii laat gulcualo quit itot de cos ni rlilo bniety ná dios. ¹⁵ Nare nánna dec púrzi bniety racbee laat, ningui lagac laat gulgaany xgab la güen ná ni caniia laat. ¹⁶ Chi rdxanní zec ni baany Xtadni Jesucrist chi baanny lúltmi cen, ax chi rdéen vin ni abiacldee ronelaazni riny ni bxíiny chi gutyny pur de xtuldní. Chiy chi rquiinni guechtily zec ni baanny lúltmi cen xtenny, niy ná tuby seny dec anan tubyzi cun laany. ¹⁷ Te pur

masqui zienni, per zec ni rgaazy tubyzi guechtily lo iratecní ziy riény dec tubyzi nan cun Crist.

¹⁸ Laat nánti xa run de bniety Israel chi renédeb tuby gun par Dios, ax zec ni rundeb cun gunqui zénedeb cuend dec anádeb tubyzi cun Dios. ¹⁹ Quít caniitia laat pur de cos ni rlilo bniety ná dios dec nuu xi sacdengui o dec nuuza xi sac de aliment ni riacldee nez lo de diosqui. ²⁰ Te pur de bniety ni quít rumbee Dios, laadébiy rundeb ziy ax gati lo Diostiy rdziideb de alimentqui, lo de bñidxabiy rsiaclideebni. Ax quit rcaaztia gacti tubyzi cun de bindxbab. ²¹ Quit xo gúntit ziy par yíany dec anát tubyzi cun de bñidxab, chiy ax iquiinzacti guechtily ne vin par yíany dec názacti tubyzi cun Crist. ²² O, ¿ta rcaaztì ichiichti Dios? ¿Tatix mazru rdxapni guelrnabee que laany?

²³ Irate zelee gún bniety, per gati irati ná güen gún bniety. Masqui irate zelee idxanni, per gati irati illiú par idxacnésaan xa chaza chonuun xnez Dios. ²⁴ Te pur quít náti par idxanni xgab pur dunzin, ná par idxanni xgab pur stuby de sáan.

²⁵ Zec chi rziit beel lo guee, quít inabdiidxtit la abiacldee beelqui pur de xtiosdeb, te par quít xi izienti iquiintini. ²⁶ Te pur xte Xtadni Dios ná guichliu cun irate ni nuu lo guichliu.

²⁷ Belati tuby ni gady chaldilaazti xtiidx Dios iniib laat chaquinti lizbi, ax belati rcaaztì chiat, gulchia. Gulquiiny irate ni iníidxbi laat sin quít xi inabdiidxtit par quít xi izienti. ²⁸ Per belati chúu tuby de saat ni iníi laat dec ni caníidx bnietqui laat abiacldeeni lo de xtiosbi, ax quít iquiintitni pur bniety ni gudixtee lot te par quít xi mal xgab gúnbí,

masqui laat nánti dec xte Xtadnì Dios ná guichliu cun irate ni nuu lo guichliu. ²⁹ Quít caniitia laat pur xa rziienti, ni caniia laat ná pur de xgab ni zelee gún stuby de saat pur laat.

Per tal belati nuut runti xgab: “Per, ¿xínii quít gúna irate ni nánna quit náti mal gúna purzílesa xgab stuby bniety? ³⁰ Tal belati rniit: Nare nánna dec rdeeda gracy Dios pur nitisy rquiinia ax, ¿xínii gúndeb mal xgab pur naa?” ³¹ Per nare rniia laat irate de cosqui ná par chanét cuend, te pur zecli pur ni rquiinti, ni réet ne irateru ni runti, ná par gúntini pur didxdoon ni napti Dios. ³² Gulcualo xa nabányti te par zecli de bniety Israel cun de ni quít ná bniety Israel ne de sanireldilaazzacti Jesucrist quít gúndeb mal xgab pur laat. ³³ Te pur ziy runa nare, rcualuaa izílenzaac irate bniety cun naa. Quít runtia ni gacné narezia, mazru runa pur gúna ni gacné ziény bniety te par chalee gapdeb perdón lo Dios.

11

¹ Pur ningui gulchanuu zec ni runa, zec ni zenuaa zec ni baany Crist.

² Nare quesentiand rzaclaaznía laat pur ni zenelaazti nare, pur ni zenedziitsti cuend ni bseeda laat ne pur ni runti zec ni bseeda laat.

³ Ziyza rcaaza isenelaaza laat dec Dios rnabee Crist chiy Crist rnabee lo de nguiu ne nguiu rnabee lo de gunaa. ⁴ Chiy chi rdxasaa bniety par itodeb Dios, tutix nguiu ni cá xi cá quiani lalzi canaabbí lo Dios o caseedzachí xtiidx Dios de bniety, ax xtiu ná ni runbi. ⁵ Ziygacza tutix gunaa ni canaab lo Dios o caseedzachí xtiidx Dios de

bniety, ne quit xi nuuti quiab, ziyza xtiuy runbi. Nalaazqui^b laab zec tuby gunaa ni bga llul quiani.

⁶ Pur ningui belati tuby gunaa quit xi rcaaztib chúu quiab, su iguab quiab. Per belati nánbi xtiu ná rga quia tuby gunaa, xtiu ná illul quiab, ax güenru cuub xi cuub quiab. ⁷ Per nguiu quit xi náti par chúu quiab o xi icaza quiab te pur Dios banchuuny laab zec ni nány laany, ax ziy rsíenbi didxdoo ni rápbi Dios. Chiy gunaa pur ni ruu xi ruu quiab, ax rsíenbi didxdoo ni rápbi nguiu.

⁸ Te pur quit gucchuti nguiu cun dxumytii^x gunaa, gunaa ná ni gucchuu cun dxumytii^x nguiu.

⁹ Nicliza quit banchuuti Dios nguiu pur ni anuu gunaa sino que banchuuny gunaa pur ni anuu nguiu. ¹⁰ Pur ningui chi rdxasaa bniety par itodeb Dios, ná par chúu xi chúu quia gunaa par yíany dec nguiu rnabee zec ni rliuu de ángli tú rnabee laadeny. ¹¹ Masqui nez lo Dios tubylote ná bniety, te pur belati quit níiu gunaa quitti nguiu, chiy belati quit níiu nguiu quitti gunaa. ¹² Didxldíquiy dec cun dxumytii^x nguiu gucchuu gunaa per anre pur gunaa rdziny nguiu guichliu, ax zecli nguiu ne gunaa pur Dios dxúun lo guichliu.

¹³ Nare rniia laat, lagacquiⁱ laat gulgaany xgab zec chi rdxasaa bniety par itodeb Dios, la ná güen inaab tuby gunaa lo Dios ne quit xi nuuti quiab.

¹⁴ Ziyza lagacquiⁱ bniety racbee dec xtiu ná quit iga quia tuby nguiu. ¹⁵ Per par tuby gunaa ax mazrul garbi^b ríenbi chi ziul guichquiab, te pur guudbini par itaaguni quiab. ¹⁶ Belati nuu ni quit ná cunformi pur ni caniia laat, per nare rguixtia lot quit xi stuby costumbríti rdxapni, ziy ná xcostumbrin

cun irarú de ni reldilaaz xtiidx Dios.

¹⁷ Anre iniiia laat stuby cos, per pur ni a iniiia laat quit xo iniitia laat dec güenquí cayunti te pur chi rdxasaat par itot Dios, lalza ni quit ná par gúnti runti. ¹⁸ Nidonidoote rniiia laat nare abindiaga dec chi rdxasaat par itot Dios quit ractit tubylo, ne cati rliluaa didxldíquiy. ¹⁹ Te pur nagánquipac par quit gac ziy, ne pur ziy ríeny tú de guldípac zenuu xnez Dios. ²⁰ Per aru pur ziy, pur guél quit nát tubylo cun de saat ax aquít xi zeloti ni rdxasaat par gúnti cen zec ni baany Xtadni Jesucrist. ²¹ Te pur cad tubytí runti pur yiub iquiinti, quit rcanuutit iraru de saat. Ax lalzi nuu ni rldiaanru, nuut axt rzuzti pur ni bquiinti ne güéet zectisy ni bcaazti. ²² ¿Ta quit lizti rut iquiinti ne güéet zectisy ni rcaazti? O, ¿ta quit rcaazti iraru de sanireldilaazti xtiidx Dios ningui rsanxiut de prob ni quit xi nap? Anre, ¿ta rcaazti saclaaznía laat pur ziy? ¡Per zectipac ni cayunti, quit xo iniitia laat dec güenquí cayunti, pur ni quit cayuntit zec ni bseeda laat!

(Mt. 26:26-29; Mr. 14:22-25; Lc. 22:14-20)

²³ Ne ni bseeda laat, nare bseedani pur Xtadni Jesucrist dec guxin ni gucny entriagu chi baanny lúltmi cen, laany cuáany tuby guechtily. ²⁴ Chiy chi gulull bdeedny gracy Dios ax bllullny guechtilqui, guniigany: “Guechtilré ná cuerpi xtena ni abaania entriagu par gatia pur laat. Ne chi gúnti zeec, gulgaanyni pur ni renelaazti nare.” ²⁵ Ziytiziac baanny cun cop ni nuu vin chi gulull baanny cen, ax guniiny: “Vinré ná ríny xtena ni ixíia chi gatia par illal tuby nez cuby xa gap briety perdón lo Dios. Ne chi gúnti zeec, gulgaanyni pur ni renelaazti nare.” ²⁶ Pur ningui nare rniiia laat,

cad chi rdxasaat par gúnti cen zec ni baany Xtadni Jesucrist, chi rquiinti guechtily ne réet vin, ziy rsíentí dec gutyny pur laat ax gulgaany ziy axtqui chi gueedny lo guichliu stuby.

²⁷ Anre belati nuu bniety ni rquiiny guechtily ne réeb vin lo cenqui ne quit zénetib cuend xi zelo ni cayunbi, ax duldiy cayunbi pur ni quit zéneb cuend xi zelo cuerpi ne riny xte Xtadni Jesucrist.

²⁸ Pur ningui ná par gún bniety xgab xa nabánybi nez lo Dios ne ixubduldbi nez lony anste iquinbi guechtily ne vin lo cenqui. ²⁹ Te pur bniety ni rquiiny guechtily ne vinqui chiy quit zéneb cuend xi zelo cuerpi xte Jesucrist, ax lagacqui laab caguílybi xquelnab. ³⁰ Te pur, pur ni run bniety ziy ningui zienzi de saat racxú, zienzideb quit nadaanti ne zienzadeb aguty. ³¹ Per belati nidoottelga idxanni xgab xa nabánni nez lo Dios ne ixubduldní nez lony anste idxanni cenqui ax aquit xi guelnati xte Dios idxáldni. ³² Per belatiza xi guelna xte Dios idxáldni, niy ná par cuxnezny dunní quit idxanni duld, te par quit idxáldni castigu ni yáld de ni quit reldilaaz xtíidxny.

³³ Pur ningui de sanioldilaazni Jesucrist, chi rdxasaat par iquiinti, gulcanuu ira de saat par iquiinti tubylo. ³⁴ Per belati nuu tubytí ni quit xo cueztib pur ni quesentiand rldiaanbi, güenru iquiinbi lizbi te par quit xi castigu isiáld Dios laat pur guél quit run zec ni riáld. Irateru ni ná par iniia laat, chi guedtixlotia laat chiyti idxueeniy.

12

¹ Anre iniia laat ni rsiáld Dios cad tuby bniety gúndeb pur guelgucné xte Spíritu Sant, te pur quit

rcaaztia ibányti sin quit gánti de cosqui.

² Laat nánti dec chi gady gumbeet Dios ax guzantí, baantí cuend de ni rniitisy bniety laat ná dios ne nicli quit rnii de cosqui. ³ Pur ningui gulgacbee, tutix bniety ni inii dec quit xi sancti Jesucrist, niy zelo quit rbeznétib Spíritu Sant. Ne ziyza quit tu bnietti chalee inii: “¡Jesucrist ná ni rnabee nare!”, belati quit rbeznéb Spíritu Sant.

⁴ Iralote rsiáld Dios dunní idxanni, dunní ni roldilaazní Jesucrist, per tubylote Spíritu Sant ná ni racné iratecni. ⁵ Masquí iriny, iriny ná xmandad Dios ni cadxanni, per tubylote loniy cadxanni sirví. ⁶ Ne masquí iriny, iriny xquel cayacné Dios dunní par idxanni de xmandadny, per tubylote Diosiy cayacné dunní. ⁷ Cad tubyní rliuu Dios dunní ni idxanni cun guelgucná xte Spíritu Sant te par idxacnén de sáan. ⁸ Te pur cun guelgucná xte Spíritu Sant nuu bniety aguud guelnán par güeeb diidx, nuuza bniety aguud guelnán par gacbee ne iseedbi bniety. ⁹ Ne pur guelgucná xte Spíritu Sant nuuza bniety aguud tuby guelreldilaaz ni xíteetepac quit runtioplaaztib dec Dios gacnénly laab. Nuuza bniety aguudbi guelnabee xte Dios par isiacbi de bniety racxú. ¹⁰ Chiy nuuza bniety aguudbi guelnabee par gúnbi iraloteru de milagri. Nuu bniety aguudbi guelnán par güeeb xtiidx Dios par iteedbi xtiidx Dios lo bniety. Pur guelgucná xte Spíritu Sant nuu de sáan aguuddeb guelnán par gacbeedeb la didxldí o la gati didxldí canii ni rnii cayuee xtiidx Dios. Nuuzadeb aguuddeb guelnán par güeedeb zienlo diidx, ne nuuzadeb aguuddeb guelnán par iteeddeb diidx

par stuby diidx. ¹¹ Per tubylote pur guelgucn  xte Sp ritu Sant run bniety de cosqui, laany an nnny c n ni rsi ldny g n cad tuby bniety.

¹² Te pur zecqui ti xn  masqui zieny ldaa n ni, per tubyzi n  iduibtecni. Ziyzaquiy dunn  ni roldilaazn  Jesucrist masqui zienn  per tubyzi nan cun laany. ¹³ Te pur iratecn  brubnisn  pur tubyzi Sp ritu Sant par gacn  tubyzi cun irateru de s  an masqui belati bniety Israel dunn  o belza gati bniety Israel dunn , belati esclav dunn  o belatiza gati esclav dunn , per tubyzi anan pur ni tubylote rbezn n Sp ritu Sant.

¹⁴ Laat n nti dec gati tuby ldaaizti n  ti x bniety, zieny ldaa n ni. ¹⁵ Anre belati inii nii bniety, “Nare quit n tia tuby ldaa bniety te pur quit n tia naa bniety.” Per gati pur ziyti ax aquit n ti nii bniety tuby ldaa bniety. ¹⁶ Ziyza masqui inii diag bniety: “Nare quit n tia tuby ldaa bniety te pur quit n tia bslo bniety”, gati pur ziyti ax aquit n ti diag bniety tuby ldaa bniety. ¹⁷ Te pur belati iduibte bniety niac bslo bniety ax, ¿x lesa guindiag bniety? O belatiza iduibte bniety niac diag bniety ax, ¿x lesa chull i bniety? ¹⁸ Per Dios an nnny cal  ri ld sub de niin, de naan ne irateru par nan zec ni rcaazny. ¹⁹ Te pur belati tubylozy ni niac iduibtecni chiy ax agati tuby cuerpi tiy. ²⁰ Per zec ni aguniia laat masqui zieny ldaa n  ti x bniety per tubyzi n  iduibtecni.

²¹ Quit xo gaipti bslo bniety naa bniety: “Quit rquiintia li .” Nicliza quit xo gaipti quia bniety de nii bniety: “Quit rquiintia laat.” ²² Te pur masqui zienzi lat ni lazu gulliaa rlli , per niyde n  ni mazru rlli . ²³ Ne de rut quit r enzaac, rdxanni

pur yíanzaacdengui. Iduibte tiixni rlliú, masqui lazu quít xi illiúti de rut ná mazru xgaats, per mazrul rdxapton de partqui te pur rdiilyni xi idacuni par yíanzaacni. ²⁴ Gulliaa rdxúun guelrsaa pur de rut zelee yíany, mazru rdxapton de rut ná xgaats ax rdacuni xi rdacuni par yíanzaac tiixni. Ziy xquel baany Dios bniety ²⁵ te par quít idxanní xgab dec nuu rut quít illiúti sino que iduibte tiixni racnésaa. ²⁶ Zec chi calí rac ax iduibte bniety rziieny guelracqui, chiy chi ríenzaac tuby latní ax iduibtezacni rzaclaaz pur ziy.

²⁷ Anre ziyzaquiy ni nan tubyzi cun Crist ax iratecní nan zec tubyzi cuerpi par laany, digapac choniin tubygan nan zec tuby ldaaga cuerpiqui. ²⁸ Ax de lo ira de sanioldilaazni Jescrist, Dios nidoote bcuabeeny de apóstol, chiy ni rrop bcuabeeny de ni güee xtiidxny de ni iteed xtiidxny lo de bniety, ni rion bcuabee Dios de ni iseed xtiidxny de bniety. Chiyru bcuabeeny de bniety ni gap guelrnabee xtenny par isiacdeb de bniety racxú, ne bcuabeezacny de bniety ni gún iraloteru de milagri. Chiy bcuabeezacny de bniety ni chalee gacné stuby de bniety, bcuabeezacny de ni inabee lo de ni reldilaaz xtiidxny ne bcuabeezacny de ni güee zienlo diidx. ²⁹ Gati irati bniety ná apóstol, nicliza gati irati bniety zelee iteed xtiidx Dios lo de bniety, nicliza gati irati bniety zelee iseed xtiidx Dios de bniety. Gati irati bniety zelee gún de milagri, ³⁰ nicliza gati irati bniety zelee isiac de bniety racxú, ne ziyza gati irati bniety zelee güee zienlo diidx ne nicliza gati irati bniety zelee iteed diidx par stuby diidx. ³¹ Per gulgaany pur

iliuu Dios laat cún ni güenru gúnti, ne nare iniaa
laat cún ni quesentiand sac gúnti: Icaaztì de saat.

13

¹ Te pur belati nare zelee güiia xitill diidx ni ruee binguichliu ne de diidx xte de ángli xte llayabaa, per belati quit rcaaza de saa bnietia ax názia zec tuby guiib ni rzez o zec tuby platíy ni nuu rseeni.
² O belatiza niálda niteeda xtiidx Dios lo de bniety, o niapzaca guelnán par niacbiia irate ni zéed pur Dios ni gady gacbeeti bniety, o niapzaca iralote guelnán, o niapzaca tuby guelreldilaaz Dios ni axt zelee ichuaa xlat de dany, per belati quit rcaaztia de saa bnietia ax quit xi zeloti ni runa.
³ Ziytiziacza masqui quiizia irate ni napa lo de ni runlieedxni chiy ideeda nare chaaicquia, per belati quit rcaaza de saa bnietia ax quit xi zeloti ni cayuna.

⁴ Guelrcaaz ná gap bniety pacency saa bnietni, gac bniety güen cun saani, quit gacnalaazti bniety, quit izubyaati bniety lagac laab ne quit gúnnarooti bniety cun saani. ⁵ Guelrcaaz ná gap bniety didx-doo saa bnietni, gún bniety xgab pur saa bnietni, quit gacti bniety nadxiich, ne quit chanellianti bniety saani, ⁶ quit saclaazti bniety pur mal ni cayun o cadeedza stuby bniety sino que saclaazbì chi zé bniety xnezni. ⁷ Guelrcaaz ná gún bniety perdón saa bnietni ni runnétisdeb laab, ne quit chaldilaazbì ni rcuaquatisdeb bniety nicliza quit initib speranz pur bniety ne güelaazbì ni runnétisy saa bnietbì laab.

⁸ Guelrcaaz quit chúuti dxi ldullni, per teru chúu dxi ni aquítru xi sacti guelnán ni rdxapni anre,

nicliza aquítru chúuti de ni iteed xtiidx Dios lo bniety nicliza de ni ruee zienlo diidx. ⁹ Te pur anre nicl belati racbeen duudx, per zienzi ni rieedx gacbeen o belatiza rteedni xtiidx Dios lo bniety ziyya zienzi ni rieedx gacbeen pur laany. ¹⁰ Per chi idziny dxi ni gacbeen irairate, chiy aquít xi sancti ni nánni anre.

¹¹ Chi guca bniiny biia diidx zec bniiny, baania xgab zec bniiny, gúpa xquelrieny bniiny. Per chi bdziny ni anaa brietroo ax bsáana irate guelbniinqui tuby lad. ¹² Ziyzaquiy anre quit racbeetin irate zecpacza chi quit ríenzaac lo tuby yaguan, per chi idziny dxi ni idzinni rut rbez Dios chiyru agacbeen irairate. Anre nuuzi ni racbiia per chi idziny dxi ni idzinia rut rbez Dios chiyru agumbiiany zec ni rumbeeny nare.

¹³ Chonlo ni quit chúuti dxi nitlo: Guelreldilaaz Dios, guelráp speranz ne guelrcaaz. Per de lo iyonte de cosqui quesentiand sac guelrcaaz.

14

¹ Gulgaany pur icaaztí de saat ne quesentiand gulnaab lo Dios iguaadny laat guelrieny par gúnti xmandadny, ne mazrupac gulgaany pur gaptí guelrieny par iseedti xtiidx Dios de bniety. ² Bniety ni ruee tuby diidx ni quit racbeeti irate bniety, nalaazquib quit tu caninétib. Diostislay caninéb pur ni quit tu racbee xtiidxbi, laatisbi nánbi xiy caniib per bniety nic rsondeb xi zelo ni caniib. ³ Per tuby bniety ni rseed xtiidx Dios de bniety ax cayacnéb xa chaza chanuu bniety xnez Dios, calidxbi bniety ne caguzaclaazbi bniety. ⁴ Ne

bniety ni ruee tuby diidx ni quit racbeeti irate bniety ax parziclab ni rueeb, per bniety ni rnii xtiidx Dios ax cayacnéb irate xpiny Dios xa chanuudeb xnezny.

⁵ Ójla iratecti nialee nienteet zienlozy diidx, per mazru güen belati chalee iseediti xtiidx Dios de bniety. Te pur mazru sac inii bniety xtiidx Dios que güee bniety zienlo diidx, o beltislaza zelee quixteeb lo bniety xi zelo ni guniib te par illiú ni guniib par iratedeb. ⁶ Te pur zecqui belati nare guedtixluaa laat de sanioldilaazni Jesucrist, chiy ininía laat cun tuby diidx ni quit racbeetit ax ¿xílesa par illiúni par laat ne belati quit nieeny xquel caguixtiia lot ni abliuu Dios nare o ni nánzaca, o quitza nieeny xquel caniia laat xtiidx Dios o xirullziruza ni ná par iseediti?

⁷ Zecqui de cos ni rzez ne ni rcuidx, zec tuby flauti o tuby arp belati quit isez o icuidxzaacza bniety quit xo gacbeeti de bniety xiy rsezbí o xiy rcuidxbí. ⁸ Ziyza belati quit icuidxzaac tuby suldad trumpet lo guerr ax, ¿xólesa gacbee de suldad dec aguld suguasindeb par chatildnédeb ni ná par tildnédeb? ⁹ Anre ziyyaqui laat belati ininét bniety cun diidx ni quit racbeedeb, ¿xólesa gacbeedeb xiy rniit? ¡Nalaazquit lagacqui laatiy caguenét diidx! ¹⁰ Laat nánti dec zienlo diidx nuu lo guichliuré, per iratecni nuu xi zeloni par ni racbeení. ¹¹ Per belati chúu ni ininé nare cun tuby diidx ni quit rueetia, cun tuby diidx ni quit racbeetia ax bñzít laab par nare ne bñzítza nare par laab. ¹² Pur ningui zec ni quesentiand rcaaztí gaptí guelrieny pur guelgucné xte Spíritu Sant par gúnti

xirullzi xmandad Dios, gulnaab lo Dios iguaadny laat tuby guelrieny ni chalee gúnti ni illiú par irate de xpíny Crist.

¹³ Ningui ni ruee tuby diidx ni quit racbeeti irate bniety, ná par inaabbi lo Dios gacnény laab te par chalee quixteeb lo de bniety xi zelo ni guniib. ¹⁴ Te pur zecqui belati nare inaaba lo Dios cun tuby ditsa ni quit racbiia ax spírittisy xtena nán xi zelo ni caniia, per nare nic rsona xizaquiy caniia. ¹⁵ Pur ningui ni riáld gúna ná, inaaba lo Dios cun spírit xtena ne gacbiia xi zelo ni caniia. Ziyza chi guulda de cant par Dios ná par iziienia ne gacbiia xi zelo ni cayuna. ¹⁶ Te pur belati iniiu de diidx zaac lo Dios cun diidx ni quit racbeetiu ax rzientiziu xiy cayunu, per nic rsonu xiy rniiu. Chiy belati bniety ni zuguaníu quit racbeetib xiy rniiu, ax quit xo iniiitib “Amén” chi abialo bdeedu gracy Dios pur ni quit racbeebl nriiu. ¹⁷ Masqui quesentiand guílly bdeedu gracy Dios, per xíeteet gucnétiu bniety ni zuguaníu par gacbeebl xa riáld chanuurub xnez Dios pur ni quit racbeebl xi guniiu. ¹⁸ Xtiosten Dios dec nare mazrupac zienlo diidx nánna lo iratecti. ¹⁹ Per masqui ziy chi zuguaa rut rdxasa de sanioldilaazni Jesucrist par ininíadeb, par nare güenrudxa masqui cun gaayzi diidx ininíadeb, per diidx ni chalee gacbeedeb ne ni illiú par laadeb par iliuudeb stuby de bniety xlat ni ininíadeb cun tsí mily diidx ni quit racbeedeb.

²⁰ De sanioldilaazni Jesucrist, quitru runti xgab zec de bninbichiin. Gulgac zec de bninbichiin per pur guél quit runti ni ná mal, per par xgab ax gulgaany xgab zec bnietroo ni anát. ²¹ Lo xqui-

its Dios rnii: “Ixialda de bniety ni ruee irinqui diidx, de bniety ni quit náti bniety ruc par ininédeb de bnietqui. Per nicli ziy quit icuadiagtideb xtiidxa, gunii Xtadnì Dios.” ²² Pur ningui guelruee zienlo diidx, niy ná tuby seny par de ni quit reldilaaz xtiidx Dios te par chaldilaazde. Per guelrseed de bniety ni rcaaz Dios gacbeedeb, niy ná ni illiú par de ni areldilaaz gati par de ni quit reldilaaz. ²³ Per niclipac ziy chi dxasaat par cacuadiagtí xtiidx Dios, chiy belati iratectí sulo güeet iriny iriny diidx ni quit tu racbeeti ne chiy belati zuguanét de ni teste güeldilaaz xtiidx Dios o de ni gady chaldilaazti xtiidxny ax, ¿tatix quit gúndeb xgab dec racdxa quiat? ²⁴ Per belati zuguanét tuby ni teste güeldilaaz o tuby ni gady chaldilaaz ne laat cayueet xtiidx Dios, ax chi guindiagbi ni cayueet, laab zacbee dec binduld laab, lagacqui laab gacbee tú laab. ²⁵ Ziy xquel gacbee xa nabánybi ax sullibbi inaabbi lo Dios, ne sniizacbi dec didxldícpac Dios zuguané laat.

²⁶ Irate ni caniia laat de saniroldilaaznì Jesucrist, caniiani te par gacbeet dec chi rdxasaat par icuadiagtí xtiidx Dios, iratectí zelee gúntí ni chalee gúnti, ni guuld tuby cant par Dios, ni iseend de bniety, ni quixtee lo de bniety cún ni abliuu Dios laab, ni güee tuby diidx ni quit racbeeti irate bniety ne ni quixtee lo de bniety xiy gunii bnietqui. Per irate ni gúntiqui gacni ni illiú chalee gacné iraru de saat par chaza sutipnédeb ni reldilaazde xtiidx Dios. ²⁷ Belati chúu de ni güee tuby diidx ni quit rueeti irate bniety, tiop o chonzideb ná par güeedeb diidx ni nándezqui, ne tubyga pur

tubygadeb, chiy chúuza ni quixtee lo de bniety xiy guniideb. ²⁸ Per belati quity ni chalee quixtee lo de bniety xiy guniideb cun diidx ni nándeb, ax güenru quit xi iniitideb nez lo de bniety. Güenru laatisdeb cun Dios nándeb xa canaabdeb lony cun xtiidxdeb nez láandeb. ²⁹ Chiy de bniety ni quixtee nez lo irate bniety cún ni abliuu Dios laadeb, tiop o chonzideb ná par inii cad chi rdxasaat, ne tubyga pur tubygazadeb. Chiy stuudxdeb acacuadiag la xnezquini ná ni caniideb. ³⁰ Per belati tuby bniety ni zub cacuadiag ne horqui iliuu Dios laab tuby cos, ax ná par igany ni caniiqui te par quixteeb lo bniety cún ni bliuu Dios laab hórgaqui. ³¹ Iratet ni abiáldti iteedti xtiidx Dios lo de bniety, iratecti zelee quixteet lo de bniety cún ni abliuu Dios laat, per tuby pur tubytí chi ná par yáldti te par iseed ne chuzaclaaz irate de ni cacuadiag. ³² Gulchané cuend dec de ni rteed xtiidx Dios lo de bniety, lagacqui laadeb ná par sudeb lodeb te par iniideb chi riáld iniideb. ³³ Te pur Dios quit rcaaztiny tuby cos ni quit nuuti xnezni, laany rcaazny tuby ni nuu xnezni te par chúu guelnaldiulaaz par cun de saat.

Anre zec ni rac irate rut rdxasaa de xpiny Crist, ³⁴ hor ni acacuadiagtí xtiidx Dios quitti permis par xi inii de gunaa zec ni gunii Dios gúndeb desde gulal. ³⁵ Belati nuu xi rcaazdeb gacbeedeb, güenru litzideb inabdiidxdeb chialdeb, te pur xtiu ná inii tuby gunaa hor ni cacuadiag iratectí xtiidx Dios.

³⁶ Gulchanelaaaz dec gati nidooti laat gucbeet xtiidx Dios nicliza gati laaiztit nánti xtiidx Dios par gúnti zec ni ná xgabti. ³⁷ Belati nuu tubytí rlilob dec aguudbi guelnán par iteedbi xtiidx Dios

lo bniety o pur Spíritu Sant aguudbi xirullziru guelnán, ax zacbeetegacbí dec ni cacuáa lo cartré ná zec ni rnabee Xtadnì Dios gúnti. ³⁸ Per belati laab quit reldilaazbí de ni caniia laat lo cartré, ziyya quit chaldilaaztit xtiidxbí.

³⁹ Anre zec ni aguniia laat de saniroldilaaznì Jesucrist, gulnaab lo Dios iguaadny laat guelnán par iteedtì xtiidxny lo bniety, ne quit icuatit inii tuby de saat ni ruee tuby ditsa ni quit racbeetit. ⁴⁰ Per irate ni gúntiqui, gulgaanyni xnez, xneznì, gulgaanyni zec ni riáld gúnti chi dxasaat par icuadiagtì xtiidx Dios.

15

¹ De saniroldilaaznì Jesucrist, ziyya rcaaza isenelaaza laat de didxzaac xte Jesucrist ni aguniia laat, de didxzaac ni agüeldilaaztì ne ni zutipnét. ² Gulchanelaaaz dec pur de didxzaacqui anaptì perdón pur de xtuldtì belati guldípacti zenuutni, per bel quítiy xíteete zeloti ni güeldilaaztìni.

³ Nidonidoote bseeda laat ni bseeda gulo. Guuniia laat dec Crist gutyny pur de xtuldnì zec ni rnii lo xquiits Dios. ⁴ Chiy bgaatsny ax ni rion dxi gubíi gubánny stuby zec ni rniiza lo xquiits Dios. ⁵ Chi gubíi gubánny stuby, chiy bliulony lo Bed chiyrù lo de apóstol. ⁶ Chiyrù bliulozacny lo tuby cuaa de ni reldilaaz laany, laadeb nádeb más de gaay gayuua bniety. Nuudeb agutydeb, per ziendeb zeczi nabányru. ⁷ Ax bliulozacny lo Santiago chiyrù lo irate de apóstol.

⁸ Pur lúltmì ax bliulony luua, nare ni naa zecpacza tuby ni rdziny agudxi par tuby mandaad.

9 Ax rziienia nare dec gulliaaru saca lo iraru de apóstol, ne nicli quit riáld idialaa apóstol pur ni guzunalda de ni reldilaaz Jesucrist. **10** Per pur güen ni ná Dios ax naa ni naa, ne quitquiza blaslaaz xlieeztiny nare te pur nare mazrupac abaania xmandadny que iraru de apóstol, masqui ni nápacni gati nareztiay cayuna de ni cayuna sino que pur guelgucné xte Dios cayuna de mandadré. **11** Ax quit xi gónti tú pur bindiagtí xtiidx Dios la pur nare o la pur stuby de apóstol, ni mazru sac ná dec abindiagtini ne agüeldilaaztini.

12 Anre zec ni abseedni laat xtiidx Dios dec Crist gubíi gubánny stuby, ¿xíni ninguiy nuut rniit dec quit ibíiti ibány de binguty? **13** Belati rniit quit ibíiti ibány de binguty, niy zelo xtiidxti dec quit gubíiti gubány Crist stuby. **14** Ne belati quit gubíi gubány Crist ax xíteete zeloti ni caseedni laat, nicliza quit xi zeloti ni reldilaaztiny. **15** Ax belati ziy, púrzi dixúy ni caniin pur Dios pur ni aguniin dec gubíi gusbánny Jesucrist. Ne belati gati didxldíy dec ibíi ibány de binguty, ax gatiza didxldítiy dec gubíi gubány Jesucrist stuby. **16** Te pur belati zec ni rniit dec quit ibíiti ibány de binguty, ax ni cliza Jesucristiy quit gubíiti gubánny. **17** Ne belati quit gubíi gubánny, xíteete zeloti ni reldilaaztiny ni cliza quity perdón par de xtuldti. **18** Belati ziy, ax axt de ni aguty quit xi perdónti napdeb masqui güeldilaazdeb Jesucrist. **19** Ne belati lo guichliutisré illiú ni roldilaazni Jesucrist ax guelreldilaaztisdxaza xtenni ná mazrupacza prob lo guichliuré.

20 Per ziy ax ni ná didxldí ná dec Jesucrist gubíi gubánny, ne laany nány ni nidonidoote gubíi

gubánnny stuby. ²¹ Ax zec ni bdiacá guelguty lo guichliuré pur tuby bniety, ziyza pur tuby bniety anuu guelnabány par de ni aguty te pur teru ibíi ibánydeb stuby. ²² Zec ni bdiacá guelguty par irate bniety pur Adán, ziyza anre pur Jesucrist anuu stuby guelnabány par de ni reldilaaz laany. ²³ Per irate zec ni gunii Dios gac: Nidoote Jesucrist ná ni gubií gubány, chiyrú chi gueedny stuby ax aibány de binguty ni güeldilaaz laany. ²⁴ Chiy chi abi-aló baanny gan rnabeeny lo irate de ni rdxichné laany, zeclí lo de ni nap guelgurtisy ne iraloteru guelnabee, chiyrú agúnny entriagu guelnabee xtenny laznaa Xtadnì Dios. ²⁵ Per ná par inabee Crist axt chi abaanny gan rnabeeny lo irate de ni rdxichné laany. ²⁶ Ne ni initlony lúltmítet ná guelguty. ²⁷ Lo xquiits Dios rnii dec Dios bdeedny guelnabee Jesucrist par inabeeny irate, per niy quit zelotiy dec néza lo Dios rnabeeny te pur Dios bdeed laany guelnabee. ²⁸ Ne dxi ni arnabee Jesucrist lo irate, chiyrú agúnny entriagu guelnabee ni bdeed Dios laany te par ainabee tubyzi Dios, tubyzi Dios ainabee irairate.

²⁹ Anre belati zec ni rniit quit ibíti ibány de ni aguty, ¿xínií rrubnis de ni rrubnis zec ni baany de bniety ni aguty ni güeldilaaz Jesucrist, ne belati quit ibíi ibány de ni aguty?

³⁰ Ax belati ziy, axt dunní ni cadxanní xmandad Dios, quit xi zeloti ni dxúun lo peligrí izaate hor. ³¹ Te pur rguixtiia lot, nare llillite nuua lo guelguty, niy ná didxldí ni rniia laat zec ni didxldízaquiy dec quesentiand rzaclaaznílaat zec xpíny Crist ni anát. ³² Anre belati lo guichliuzré

illiú ni cayuna ax xíteete zeloti ni bteed de biny Efeso nare, laadeb ni nialaaazdeb zecpacza de manydialaaz. Te pur belati quit ibány de binguty ax güenrudxa idxanní zec ni rnii de ni rnii: “Gultoo iquiinní ne idéen te pur illí agutyni.”

³³ Per nare rniliaa laat quit isaanti gacti engany pur ziy. Te pur guelrun cuend xtiidx de ni quit zé xnezni, niy aparzipac illiin zec ni nabánytiy. ³⁴ Pur ningui gulgaany xgab zec ni riáld ne quintru runti duld te pur nuut lazu quit rumbeet Dios, ningui caniia laat zeec te par itiulot.

³⁵ Per tal belati nuut runti xgab: ¿Xo ibíi ibány de binguty? ¿Xi cuerpi ná ni gapdeb? ³⁶ Per xgabqui, xgab ni quit inianlaazziy. Te pur laat nánti dec chi rbaaicqui bniety tuby biny, chi abldienni ax rnitlo biny ni gulaaicqui bniety. ³⁷ Gati cuaanti ni rldienqui rbaaicqui bniety sino que biny xtenny, zec ni run bniety cun trigu o xirullziruza biny. ³⁸ Per chi rldienni ax anáni cuaneen zec ni rnabee Dios gacni, xitill biny ni rbaaicqui bniety a ná xi cuaneen ildieny gati tubyloizti ná cuaneen xte irate biny. ³⁹ Zecqui ni irinqui ná tiix bniety par tiix de ladxaa ne irinqui ná tiix de beld par tiix de maniin. ⁴⁰ Chiy irinqui ná de ni nuu llayabaa par de ni nuu lo guichliu, irinqui xquel garbi de ni nuu llayabaa par de ni nuu lo guichliu. ⁴¹ Irinqui rcuabcháa gubidx par búiu ne irinqui rcuabcháa de balgui, axt lagac de balgui irinqui rcuabcháa tuby balgui par stuby balgui.

⁴² Anre ziyzaquiy gac ni ibíi ibány de binguty. Cuerpi ni rgaatsqui ruudxni ax rnitolni, per cuerpi ni gap bniety stuby aquit chúuti dxi nitloni. ⁴³ Rgaats tuby cuerpi ni ruudxi, per chi ibíi ibány

bniety agap bniety tuby cuerpi nasaa ni aquit xi gacti. Cuerpi ni rgaatsqui aquitru xi xjuerstini, per chi ibii ibány bniety ax agap bniety tuby cuerpi ni anap juers zec ni riáld. ⁴⁴ Rgaats cuerpi ni nap bniety lo guichliuré, per chi ibii ibány bniety agap bniety tuby cuerpi ni illiú llayabaa. Te pur zec ni nuu cuerpi par lo guichliuré ziyya nuu cuerpi par llayabaa.

⁴⁵ Lo xquiits Dios rnii dec nidoote Adán gúp guelnabány lo guichliuré. Chiyru beed Jesucrist, laany ni rguaadny guelnabány bniety. ⁴⁶ Ax anre zec Adán nidoote ráp bniety guelnabány lo guichliuré, chiyru agap bniety guelnabány llayabaa zec Jesucrist. ⁴⁷ Adán cun yiu gucchub ax bniety guichliu laab, per Jesucrist llayabaa zány. ⁴⁸ Irate bniety guichliu ná xcuerpini zec cuerpi ni gúp Adán lo guichliuré, per chi idziny dxi ax agap bniety tuby cuerpi zec ni nap Jesucrist llayabaa. ⁴⁹ Te pur zec ni nan zec ni gac Adán lo guichliuré, ziyya zaczacni zec ni ná Jesucrist llayabaa.

⁵⁰ Ax rguixtiia lot de sanioldilaazni Jesucrist, cuerpi ni rdxapni lo guichliuré quit xo yiutini llayabaa rut canabee Dios. Te pur ni teru nitlo quit xo yiutini rut nuu ni quit chúuti dxi nitlo. ⁵¹ Per rcaaaza gacheet tuby cos ni gady gadixteeti lot dec gati iratin gatyni, per iratecní schu zec ni nan, sdxapni irinqui cuerpi. ⁵² Niy gacquiy chi guindiagni trumpet ni quixtee dec aguld izan lo guichliuré, ax de tuby rat par stuby rat zeczipac ni rtinguidy bslo bniety abchugac zec ni nan. Chi icuidx trumpetqui ibány de ni güeldilaaz

Crist, ne aquitru chúuti dxi gatydeb chiy horqui abchuza zec ni nan anre.⁵³ Te pur rquiinpac ichu guelnabány ni rdxapni anre par stuby guelnabány ni quit chúuti dxi ldull ne ichuza cuerpi ni rdxapni lo guichliuré par stuby cuerpi ni aquit chúuti dxi gaty.⁵⁴ Chiy chi abchu guelnabány ni rdxapni anre par stuby guelnabány ni quit chúuti dxi ldull, ne chi abchuza cuerpi ni rdxapni lo guichliuré par stuby cuerpi ni aquit chúuti dxi gaty, dxiqui ná ni aguzub zec ni cá lo xquiits Dios rut rnii: “Ruytisy abialotec guc gan lo guelguty.”⁵⁵ Ne chiyza ná ni aguzub zec ni cá lo xquiits Dios rut rnii: “Guelguty, ¿cúnlesa ni niunu gan? ¿Cúnlesa guelnalas ni rteedu bniety?”⁵⁶ Guelnalas xte guelguty ná pur causi duld, ne pur ley racbee bniety dec duld ná ni rnabee laab.⁵⁷ Per xtiosten Xtadni Dios, laany ni racnény dunní par idxanni gan lo de cosqui pur guelguty xte Xtadni Jesucrist.

⁵⁸ Pur ningui de sanioldilaazni Jesucrist zec ni rcaaza laat nare rniiia laat, gulsutip ne quit guntioplaaztit. Dxi pur dxi gulgaany pur gúnrut xmandad Dios, te pur laat nánti dec quit xlleetzi ná irate ni cayunti par Xtadni Dios.

16

¹ Anre pur mily ni ná par ichasaat par gacnét stuby de sanioldilaazni Jesucrist, gulgaany zec ni gunabiia gún de sanioldilaazni Jesucrist nez Galacia. ² Gazub chitmigu cad tubytí gulzaa zecti ni rlilot según baanti gan tuxman, te par chi guelda aquit rquiinti idop milyqui. ³ Chiy chi idzinia, de bniety ni icuabeet par ixiaalda chasáan gunqui Jerusalén ax ixialdníadeb de cart ni quixtee

tú laadeb. ⁴ Ne belati rliluaa dec rquiiny cháa ax zeníadeb.

⁵ Nidoote ná par teda de nez Macedonia chiyru guelda Corinto par guedtixluaa laat. ⁶ Tal belati xchipac suguanía laat. Tal belati iduibte tiamp guelnald suguanía laat, chiyru acuneztí nare par chalee cháa rut ná par cháa. ⁷ Quit rcaaztia guedtixluaa laat tubylazanezzi, rcaaza gacldaa-paca cun laat belati Dios iníidxny permis. ⁸ Per anre ná par yáana Efeso axtisy chi abdzíngax laní Pentecostés, ⁹ te pur ruré laiquipac bllal nez par guindiag de bniety xtiidx Dios ne nare rliluaa dec zieny de ni chaldilaazny, masqui ziyza zieny de ni rdixichné nare pur ziy.

¹⁰ Chi idziny Timoteo, gulgaany pur izíenzaacbí cun laat, te pur saatiziac xmandad Dios ni cayuna cayunzacbí. ¹¹ Pur ningui nic tubytí quit góntit menos cun laab sino que gulgacnéb, guldunezbí te par chalaab xnezbí sin guelrsaa ax idzínbí ruré rut canuaab cun stuby stiop de sáan ni zednéb.

¹² Ne Apolos, nare banlasa lob nianéb laadeb par niatixlob laat, per quit nizigueldtib níab anre, per zetixlocbí laat chi chalee.

¹³ Gulsuguasin ne gulsutipné ni reldilaaztí Jesucrist. Gulgüelaaz zectisy ni guedguaald ne gulsutip. ¹⁴ Irate ni gónti, gulsaclaaz gulgaanyti.

¹⁵ De saniroldilaazni Jesucrist, laat nánti dec Estéfanas cun irate xfamilbí laadeb ná ni nidoote güeldilaazdeb Jesucrist nez Acaya, ne nánzactí xa xquel cayacnédeb de saniroldilaazni Jesucrist. Ningui nare rniiia laat: ¹⁶ Saa de bnietqui gulgaany cuenddeb cun irateru de ni cayun o cayacnéza cayac xmandad Dios.

17 Quesentiand rzaclaaaza chi bdziny Estéfanas, Fortunato ne Acaico ruré. Te pur, pur laadeb bziienia zectiziac chi zuguaníaa iratecti. **18** Laadeb guluzaclaazdeb nare nezré zec ni rguzaclaazdeb laat, ax saa de bnietqui gulgáp didxdoodeb.

19 Irate de sanioldilaazni Jesucrist nez Asiaré rguaapdebdios laat. Chiy Aquila ne chialbi Priscila cun irateru de xpiny Crist ni rdxassaa lizdeb, rguaapzadebdios laat zec xpiny Crist ni nan. **20** Irate de sanioldilaazni Jesucrist rguaapdios laat. Ne nare rnquia laat: Hórtisy ni rdxáat de saat, gulninesaa zec ni riáld gúnti.

21 Nare Pabli, narepaca cacuáa de letriré par caguaapadios laat.

22 Belati nuu bniety quit rcaaztib Xtadni Jesucrist, laab ariáldbí castigu xte Dios. ¡Xtadni Jesucrist ziub gueedny!

23 Ne Xtadni Jesucrist laany gunldeeney quia iratecti. **24** Zec xpiny Crist ni nan tubylote rcaaza iratecti. Amén.

**Xtiidx Dios cun ditsa
New Testament in Zapotec, San Juan Guelavía
(MX:zab:Zapotec, San Juan Guelavía)**

copyright © 1995 Wycliffe Bible Translators, Inc.

Language: Zapotec, San Juan Guelavía

Translation by: Wycliffe Bible Translators, Inc.

Zapotec, San Juan Guelavía

zab

Mexico

Copyright Information

© 1995, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, San Juan Guelavía

© 1995, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

xlviii

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

4b6898c2-1ae7-5b64-b781-1a33bd63388f